

Ka Nönberche nië woon

Fö' miich als Maafrank hods ümme nex annesch gejm als wie Öjbe- un' Unnefrankn. Dos dou a Middlfrankn aa nuch woo, hou ich äscht innawoon, als ich in Nönberch gearwed hou. An denna ihr Schprouch konnt ich mich nië gewöh, ouwe daß Nönberch aa schöna Seitn hod, hou ich äscht nouchanouch gemerkt. Heit nuch gibts fö' miich kan' schönern Weihnachtsmarkt als 'n Christkindlesmarkt in Nönberch, un' wie öft ich scho' im Dürehaus un' aufdä Kaiseborch uëm woo, kaa ich goo nümme gsouch. Un' dä Siemjählich Kriech is draa schuld, daß ich aa die protestantisch Umgejchnd besucht hou, weil ich amol an Film übe sälln Kriech gsähn hou, wu sa ümme des Lied gspielt ham: Auf, Ansbach Dragone' - Ich heit nië glabbt, daß Ansbach su a reiznds Schdäddla is. Ich bin dorchs Markgrafnschluëß ganga - wie amol zuvoo dorch des vo' Bayreuth - un' me merkt halt gleich, daß sälla zwaa Schdedt midanande vewandt sen un' ümme woon - die sen es Gejchntaal vo' Bambarch un' Wözborch, wu ölles katholisch is un' a weng langsame un' gemütliche - die sen marra ludderisch-preußisch, heit nuch. Eichstätt degejng, obwohls aa nuch zo Middlfrankn ghööt, is ganz annesch als Ansbach odde Bayreuth - des könnt wie Wözborch an dä "Pfaffngass" am Maa geliech - es is aa a wengla a veschloufns Bischofsschedtla.

Mei liebsta Schdadttour vo' Nönberch aus is ouwe ümme nouch Rothenborch gewejn. Wemme vom Rathaus die Herrngass' nunne nein Borchgartn gedd un' guckt übe'n Taube'taal - vill schönra Aussichtn kaas in Frankn nümme gejb. Kaa Wunne daß su vill Amergaane nouch Rothenborch kumma. Un' dann nuch Dinksbühl, Wolframs-Eschenbach - in Nönberch un' seine' Umgejchnd kaame sich 'es Middlalte un' die Riddeszeit lebendich gemach.

Am mastn hods mich ouwe am Wochenend ausdä Nönberche Staa-wüstn, wu ich ümme mein Maa vemißt hou - denn an, dä am Maa aufgewachsn is', kaa ja a annre Fluuß, wie die Pegnitz in Nönberch, es Wasse nië reich - nunte' nein Altmühltaal gezüëchn. Hou äscht die Schlösse in Ellinga un' Pappenhaam betracht - dann bin ich 'in Fluuß naufmarschiert nouch Solnhuëfn. Die altn Anglsaxn die wu nouch Frankn kumma sen middn Kruzifix - dä Kilian un' dä Willibald - die ham gewußt,

worüm sa sich mid ihra Jünge an Flүүß wie'n Maa
odde die Altmühl niedegelousn ham - dodd woon Fiisch in
Hüll un' Füll un' die Stroußn woon nië su staabich wie
zwischn dä Franknhöh un' Nönberch, wu die Strauchridde
ghaust ham - falls zu dere Zeit scho' Stroußn in Frankn
übehabbt gejm hod.

Su schöö wie ich aa middä Zeit Middlfrankn gfunna hou -
an Nönberch konnt ich mich doch nië gewöh - an Maafrank
fehlt halt ümme dä Maa. Ich hou entdeckt, daß außern
Altmühlal aa noch annra romantische Flүүstäle un'
Schluchtn in Frankn sen, ich bin die Wiesent nouchge-
wandert vo' Muggndorf nouch Pottnstaa, in Gößwaastaa
hod mich die Kerch an "mein" Balthasar Neumann vo'
Wözborch erinnert - ich bin dorchs dunkla Höllntal bei
Bad Stebn geklettert - ouwe ölles konnt halt an mein
Maa nië raa - dou hod kaa Födde Kerwa gholfn un' kaa
Erlange Berchkerwa, ka Lorenzkerchn, ka Könichs-Strouß
mid die villn Gschäftna un' kaa Christkindlesmarkt -
bin kaa Nönberche nië woon, an Wözborsche fehlt halt wu
annesch sei Maabrück, sei Marienberch un' sei Flүүß.